

Saturday, July 4, 2026

Time - 2:30pm - 2:35pm

AKASHVANI AIZAWL

REGIONAL NEWS UNIT

SIR

Special Intensive Revision (SIR) 2026 thawh thumna kalpui mekah, Mizoramah vote nei mipa nuai 3, sing 9, sang 9, 25 leh hmeichhia nuai 4, sing 2, sang 9, 881, an vaiin mi nuai 8, sing 2, sang 8, 906 an awm.

Wawiina Chief Electoral Officer Pi Garima Gupta-i'n I&PR Conference Hall, Aizawla thuthar thehdarhtute a kawmnaah he thu hi sawiin, Mizoramah May ni 30 atang khan Enumeration Phase kalpui tan niin, Mizorama BLO te chuan in tina lut lawrin Enumeration Form nuai 8, sing 7, sang 5, 68 sem chhuakin, Enumeration Form nuai 8, sing 2, sang 8, 906 an lakhawm a, EF an lak let theih loh mi sing 4, sang 6, 163 te chu mitthi tawh, awmna chin hriat loh, hmun danga pem, roll a thun tawh leh chhan dang vang te a ni.

Assembly bial zingah Aizawl South II bial chu EF lak khawm theih loh tam berna niin, 2,351 a awm a ni. Aizawl district-ah vote nei thei tam berin mi nuai 2, sing 7, sang 2, 366 an awm a, Hnahthial district chu an tlem berna niin vote nei mi sing 1, sang 5, 443 an awm a, Mizoram pumah service voter mipa 4091 leh hmeichhia 91 an awm bawk a ni. Vote nei zingah thalai kum 30 atanga kum 39 inkar tam berin mi nuai 2, sing 3, sang 1, 879 an awm a ni.

CEO Pi Garima Gupta chuan SIR, 2026 Third Phase kalpui mek state 16 leh Union Territory 2 zingah Mizoram chu Enumeration Form zaa za digitization zo hmasa ber a ni tih a sawi a, June ni 25 khan zawh fel a ni. Mizoram Assembly bial zingah Tuichang bial leh District zingah Khawzawl District te chu Mizorama enumeration form digitization zo fel hmasa ber an nih thu a sawi bawk a. Election Commission of India (ECI) ruahmanna ang chuan Draft Electoral Roll tar chhuah ni chu Naktuk Pathianni a nih avangin CEO Office, Mizoram ngenna angin vawiin hian sawn a ni a, District hrang hrangah pawh Draft Roll hi vawiin khan tarchhuah a ni. Vawiina draft roll tlangzarh a nih atang hian thla leh August ni 4 thleng, Draft roll-a chuang ve hman lo kum tling thar te, Enumeration Form thehlut ve hman lo te, Electoral roll atanga paih ngai, draft roll-a chuang si an awm chuan te leh Electoral Roll-a chuang tawh siam that ngai nei te tan claims and objection period hawn a ni dawn a ni.



CADC

Chakma Autonomous District Council-a Chief Executive Member atan Nirupam Chakma ruat a ni.

Larsap Gen (Rtd) Vijay Kumar Singh an Pu Nirupam Chakma ruatna lehkha hi nimin khan tihchhuah niin District Council and Minority Affairs Department

thuchhuah tarlan danin Larsap chuan Kamalanagar South Constituency atanga thlan tlin leh Chakma Democratic Alliance Legislature Party Leader Pu Nirupam Chakma chu CEM atan a ruat a, CEM thar hian District Council ah ni 7 chhung thlawptu a neih leh neihloh finfiah turin a ti bawk.

Thuchhuah tarlan danin CADC-a CEM atan Pu Nirupam Chakma in a pisa a luah rualin Governor’s Rule chu hlih a ni dawn a ni.



TERRORIST

Union Home Ministry chuan Pakistan a bu khuar mek mi 23 te chu terrorist-ah wawiin khan a puang.

Home Ministry thuchhuakin a tarlan firfiak a puan tak mi 23 te hi Jaish-e-Mohammad, Lashkar-e-Taiba leh helpawl dang nen an inzawm tih finfiah a ni tawh a, heng zinga mi 17 te hi Pakstian khua leh tui an nih bakah mi paruk dangte chu India khua leh tui an nih thu tichhuakin Home Ministry chuan heng mite hi India ram chhunga a rawl ral a chetna kawngah a mei zang hlaptu ber an nih thu a tarlang bawk.



TELEGRAM

Sorkar laipui chuan, thu leh ennawm hrang hrang inthawn tawnna Telegram ah piracy a tam hle ni a sawiin, hemi chungchang ti reh tura hma la turin a hriattir.

Thudawn danin Telegram ah hian pirated film bakah ennawm pangngai lo tak tak a tam a, heng te hi nuai reh a, an hmalakna ni 15 chhunga thehlut turin Sorkar Laipui chuan Telegram hi a hriattir a ni.

He hmalakna hi ram chhung sum leh pai dinhmun vawnhimna tur a nih bakah, film siamtute, a hralhchhuaktute leh a industry humhimna tur a ni.

